

摘藻堂四庫全書薈要

集部

欽定四庫全書薈要卷二萬三百四集部

宋詩鈔卷五十一

內閣中書舍人吳之振編

汪藻浮溪集鈔

藻字彥章德興人入太學登進士歷江西提舉徽宗
製君臣慶會閣詩藻所和羣臣莫及傳稱於時時胡
伸亦以文名人為語曰江左二寶胡伸汪藻遷著作
郎忤王黼與祠寓晉陵八年欽宗遷起居舍人高宗

歷擢中書給事侍講直學士院一時詔令多出其手
拜翰林學士以所御白團扇親書紫誥仍兼給黃麻
似六經十字以賜除龍圖閣奏纂三朝日歷進顯謨
閣學士知徽州論落職居永州卒在晉陵時徐俯洪
炎洪芻自負無所屈見藻詩於僧壁喟曰我輩人也
詣舍上謁而去藻歎曰撚鬚琢句騷人墨客不平之
鳴耳烏足尚哉詩高華有骨興寄深遠有浮溪集六
十卷失傳此選本文粹所存也

桃源行

祖龍門外神傳壁方士猶言仙可得東行欲與羨門親
咫尺蓬萊滄海隔那知平地有青春只屬尋常避世人
關中日月空萬古花下山川長一身中原別後無消息
聞說瓜分因感昔誰教晉鼎判東西却愧秦城限南北
人間萬事愈可憐此地當時亦偶然何事區區漢天子
種桃辛苦望長年

過吳明叟新居

誰開大屋沉沉者門外垂楊拂車馬主人四十持節歸
高卧綠陰啼鳥下冥冥一徑傍花入忽有清池照淡夏
魚吹落日知鏡淨荷受微風看珠瀉夫君少有湖海氣
欲駟馬鯨無地跨故將能事驚世人坐向雲端差萬瓦
稍培幽桂出窓底時放青山來竹罇人言此興極不淺
天遣公忙那肯赦要須更作輞川圖他日思歸聊對畫
同張昌時宿高明寺

幽卧不知覺牕懸寒日初矧伊夜來雨谿聲到吾廬故

人挽我出忽枉天際書躋險敢自休青山轉籃輿相逢
竹間寺共擷園中蔬殘僧誰在亡庵忽十載餘茗果話
疇昔新晴報鐘魚東雷亦已鳴百草茗穎舒奈何與之
子齒髮日夜疎眷此不能發牽衣更踟躕明朝各回首
世事將焉如

次高郵軍

小雨靜林麓鵲鳩相應鳴移舟漾清深薄晚荷氣生歸
鳥盡雙去潛魚時一驚菰蒲若無人渺渺炊煙橫艇子

櫂迎我攜魚薦南烹月出殊未高疎林隱微明依沒會有處斗掛天邊城

阻風雨辟邪渡寄王仲成

渡頭急雨鳴森木木杪顛風飛大屋沒腰寒水稻生芽
滿眼青泥車折軸山行值雨舟值風窮愁日日煩天公
不如歸卧澗壑底世事一埽春煙空別君兩年重此別
喜君曾次渾氷雪擬將身作賈胡留無奈事如空鳥滅
挽我不回君怒嗔交情把玩轉清新相隨百里還相見

只有西山似故人

避地函亭野步

今日幸無雨
天空出遙岑
行行不知疲
遂至春江潯
汲路轉籬落
人家在桑陰
平疇漲清波
隴麥如人深
溝畎戲鳬鶩
新蒲映浮沈
我生本樵漁
對此諧初心
風物豈不好
悲來自難任
囂塵動輦鼓
四海如驚禽
黃屋狩萬里
兩宮隔辰參
龍移螭螭窺
月晦蟾蜍侵
宇宙有傾覆
茲游豈嘔歎
銷憂賴濁醪
太息誰能斟

庚午歲屏居零陵七月二十日以門揜候蟲秋為

韻賦五首

幽人獨夜時潮落西川根渡口櫓聲急一江烟雨昏城
頭短長更不寐聽譙門趺坐數千息焚香待朝暾

暑退潦亦收瀟湘淨如染時觀自跳魚衝破青琬琰纖
纖初弦月不受薄雲揜近村應漸寒已有鴉數點

人生幾聰明日夜隙駒驟纔經花信風又過麥秋候吾
非金石堅與世相邂逅胡為聞鐘鳴更歷路傍堠

家山在何許渺渺彭蠡東人來數月程衣敝補道中昨
宵青燈花似墜釵頭蟲兒飢女沈綿歲晚書未通

人言間濶者一日如三秋孤臣昔放逐七見天星周早

誇高門地姓名記前旒如何天難星不照湘南州

天星
周一

作寒
暑周

次韻向君受感秋

且欲相隨首箇盤不須多問沐猴冠菊花有意浮杯酒
桐葉無聲下井欄千里江山漁笛晚十年燈火客羶寒

男兒幾許功名事華髮催人不少寬

向侯挂笏意千里肯為俗彈頭上冠何時盛之青瑣闥
妙語付以烏絲欄日邊人去鴈行斷江上秋高楓葉寒
向來叔度儻公是一見使我窮愁寬

晚發吳城山

風埽陽侯雪陣平雨催摩詰畫圖成氣吞浦溆重林盡
秋著江湖去鳥明厚祿故人無一字長年三老伴餘生
會須滿意開懷抱到眼廬山不世情

過臨平

一別九霄路風煙長滿衣已成身老大無復世輕肥天
濶鳥雙下山寒人獨歸曉來何似雨春水半巖扉
睡起涼生岸鉤簾坐小窻麥風能起柁梅雨不鳴江往
事心長折歸途影自雙依然蒲柳地人老故先降

書寧川驛壁

過眼空花一餉休坐狂猶得佐名州雖遭瀧吏嗤韓子
却喜溪神識柳侯盡日野田行擺種有時雲嶠聽鉤輅

卷五十一
會將新濯滄浪足踏遍千巖萬壑秋

宿鄮侯鎮

當時踏月此長亭鬢似河堤柳色青今日重來堤樹老
一簪華髮戴寒星

微涼初破候蟲秋露草螢光已不流搔首與誰論往事
星河無語下城頭

龜山上方

度險逢幽處憑誰寫壯懷連甍棲絕壁孤塔表長淮地

本吳楓接山今禹績皆潮聲從過寺竹影自翻堦木杪
朱欄出城坳雪浪埋乾坤迷枉渚霧雨泄陰崖丹葉經
寒在蒼洲向晚佳魚龍宵聽唳猿鳥晝窺齋月滿蟬珠
實霜清磬石諧僧盂收柏子樵徑埽松釵左宦書無鴈
南烹菜有鮭風煙欺短髮雲水信殘骸竟作何鄉老虛
慚素尚乖江湖今在眼歸合辦青鞋

醉別李高侍郎

疇昔追隨翰墨場功名今日愧劉郎英姿合上凌烟閣

巧諧曾遭偃月堂雙槳又乘清夜去一樽聊發少年狂
歸來却共燈花語騎省看成滿鏡霜

漫興

晨起脩然曳杖行一簾疎雨作秋清老來歲月能多少
看得栽花結子成

燕子年年入戶飛向人無是亦無非來春強健還相見
送汝將雛又一歸

北窗

睡起無一事怡然吟庭柯綠陰微缺處最得南颺多

己酉亂後寄常州使君姪

汾水遊仍遠瑤池宴未歸航遷新廟主矢及近臣衣戎
馬窺天塹邊烽斷日畿百年淮海地回首忽成非

古鏡行

我有辟邪鏡得之咸陽宮其陰為天池一母將九龍旁
書負圖字土蝕如旋蟲絨以駭雞珍妙極倖之工請言
照遠近十里秋毫空豈不鑒脂澤所貴肝膽通問誰為

此器太古非人功
客聞重歎息意欲窺靈蹤
高臺不辭倚恐客難稱
容繩窮匣半啟四室來悲風
日車當書留羞澁如頑銅
森然髮上指凜若臨霜鋒
我還撫客手此豈世寶同
揮淚兩無言掩鏡鞞囊中

蔡天任韻

脩廊過午夕陰合
蝴蝶滿庭春草長
呼兒更捲簾數尺
要放晚晴升屋梁

宋詩鈔卷五十一

欽定四庫全書薈要卷二萬三百五

集部

宋詩鈔卷五十二

內閣中書舍人吳之振編

范浚香溪集鈔

浚字茂明婺之蘭江人紹興中舉賢良方正昆弟多
居牖仕竟以秦檜當國抗節不起隱於香溪因稱香
溪先生著書明道多本於經學朱子取其心箴於孟
子集註中繇是重於儒林金仁山謂其集近亡此本

為其從子元卿所輯而陳巖肖弁序者為香溪集

雜興五首

雉驕有擅澤雞雄亦專
栖人肆桀傲未異雉與雞
虛張盡客氣不知墮危機
雉驕或登俎雞雄亦為犧
嗟爾桀倣子不戒將安之

荆梟昔見惡去楚將巢
吳妖音不知革吳豈荆人
殊梟能戒頰舌勿復輕鳴
呼雖荆亦容爾何必他邦
居

高蟬蔭嘉木未省塘斧危
勇蟲亦何愚不顧黃雀飢
癡

癡挾彈子已復露霑衣世事無不然古今同一悲
鵲噪得歡喜烏鳴得憎嗔烏鵲自有口噪鳴何預人烏
飛聲啞啞鵲飛聲嘖嘖凡鳥從紛紛未用置肝膈
彭亨著冠猪踉蹌上車鶴皇家一清明此輩東高閣龍
夔雜鵲驚庶位已參錯少安真可待四海得耕鑿我亦
幸豐年從容一丘壑

題八馬圖

何年畫工搨毛錐貌此八馬姿權奇青絲絡頭十二蹄

調柔意態行愉怡五馬放浪無維羈或齏或望仍迴嘶
一牧牽鞵一牧騎製度髣髴唐巾衣不知此馬生何時
昔周穆王遠遊嬉駕跨八駿驅東西高升崑崙躡瑤池
騶騄驥驪勞飛馳日走萬里無停驂興元唐家危累基
百拳僅脫朱泚圍黃屋進狩懷光追八馬八谷七馬疲
筋攣肉綻行人悲兩者資世皆顛羸虛名何有千載垂
空得傳記流歌詩未知此馬間猶夷牧垆不受鞭笞威
不踣險遠安無危泉甘草薦足自肥安用號駿稱雲騅

嗟哉畫意誰能知

送春曲

春光春光勸汝一杯酒
我能为春作高歌
未解春能聽
歌否春歸有底急
落盡桃花紅園溪
漠漠野陰靜
兔葵燕麥空
搖風風光幾何時
背我忽如客
殘絲欲斷感春心
語燕勞勞上簾額
我有惜芳意
一春憐物華
春來雪裏索梅笑
春去悵望飛楊花
春歸知復來
奈此斷年別
垂楊三月暮
天愁鷓鴣一聲
芳草歇
歌竟我亦醉
一棹

觥船空明年待春花樹下放歌擎酒相迎逢

同伯通端杲姪效盧仝體

一春癡癖門長扃兩耳不聞鶻鴂聲不知東南風掃盡
紅紫英行行點檢桃李徑但見樹子青冥冥門前水流
渠照灼須眉清科斗遊其間脚股各已生渠旁草鬱鬱
草底蚯蚓鳴韻如抽繭絲幽咽得我聽念此瑣細物隨
時變音形黃河赤鯉或點額老驥塞默長羈纓嗟嗟世
路真難行

六笑

我笑支道林遠移買山書巢由古達士不聞買山居我
笑賀知章欲乞鑑湖水嚴陵釣清江何曾問天子我笑
陶靖節自祭真忘情胡為托青鳥乃欲長年齡我笑王
無功琴外無所欲當其戀五斗乃獨不知足我笑杜子
美夙昔具扁舟老大意轉拙欲伴習池遊我笑韓退之
不取萬乘相三黜竟不去觸事得譏謗客言莫謾笑古
人笑人未必不受嗔螳螂襲蟬雀在後只恐有人還笑

君迴頭生愧不能語嘲評

去聲

從今吞不吐譽堯非桀亦

何為訕周譏禹終無取

讀揚子雲傳

老不曉事揚子雲綴文譏訶堅逐貧班生曲筆甚假借
謂不戚戚元非真草玄欲作後人計投閣自迷身不利
王涯筮卜好其書寧復逆知甘露事鼃聲紫色欺昏童
義士遠引如冥鴻胡為顛眩尚執戟美新屈首稱臣雄
嶠山沃野蹲鴟大拓落不歸良已過近危竟似井眉瓶

虛作反騷嗤楚些詭情懷祿遭嘲評但用筆墨垂聲名
文章要亦千古事久矣法言今正行

讀王建射虎行

我讀射虎行感慨興長歎官差射虎得虎難山下遠立
常空還惜留猛虎著山裏射殺顧恐終身間有如邊將
圖偷安遵養時晦容其姦翻愁努力盡高鳥良弓挂壁
無由彎君不見劉臣容高千里留賊自資媒富貴恐賊
盡誅身不利坐令屈律裏頭人橫暴九州狂螫噬嗟嗟

忠臣心不移受刀摩頸甘如飴紛紛血刃勇不顧一死
未謝君王知官軍壯志吞四海匈奴不滅寧家為相公
誓欲平淮西慨言賊在歸無期霍公裴公今已矣我吟
射虎徒歔歔

理喻

郵亭羈客寒無氈夜懷家山情惘然燈前坐感雨蕭瑟
浩歎達曉愁無眠鄰翁不出蓬茨裏聽雨聽風心似水
黃昏鼻息已雷鳴往往簷喧不經耳愁霖一種聲紛紛

鄰翁不聞羈客聞是中轉物有妙理起予暗契漆園旨
凌霄花

栽松待成陰種漆擬作器人皆笑艱拙往往後得利君
看植凌霄百尺蔓柔翠新花鬱煌煌照日吐妍媚風霜
忽搖落大木亦彫瘁視爾託根生枯莖無殘蒂先榮疾
蕭瑟物理固難恃凌霄亟芳華哀歎亦容易

寄題鄭亨仲可友亭

鄭君坐交窮結柳窮不去無朋長獨立老大荒村住荒

村掃人迹取友惟西山當應愛山標可望不可攀牽蘿
架風亭截薛揖高調修簷入危碧阮眼坐相照嗟今輕
薄子對面生九疑寧如友真山貞質終無移憐君意超
超愧我勞勿勿未共結交心漫負心脾骨

暮春病起絕句

老去長閒百不營推書習靜更真清西窗日脚籬篩動
時有飛蟲撲紙聲

浦江華藏寺如勝上人欲募施者開田佐僧供以

長老皎公書來求予詩作二十韻奉勉

浮圖謝朋親屏跡藏岩幽多規脫徭賦豈必皆禪流自
言佛遺經墾土為愆尤不耕徒穀腹何異鼠雀偷告之
勿浮食當須力鋤耰前修舉鋤事千載垂風猷奈何啞
羊僧百語不領頭皎公老禪伯雅慕吾孔周其徒有如
勝用意非常儔欲開千畦田更辦兩具牛率彼枯木衆
躬耕食其秋釋門有添丁乃翁坐無憂與國助耘耔疲
眊庶其瘳此志良足嘉感之歎綢繆昔聞白黑衆十萬

俱清修鳩金置千畝給供無時休于今豈無人勝也當
尋求長途觸隆冬一衲寒飈飈朱門立雪久歡喜無生
愁作詩勸勇往以俟歲晚收

三月廿六日夜同端臣端杲姪觀異書效李長吉
體

楊花亂落青春暮燕拂簾旌傍人語縹壺買酒洗春愁
迴風落日簷花舞赫蹏斷爛千載書青燈照字驚蟬魚
冬烘老生時自哂安用盤盂學田蚡

狂泉

昔有大荒國水以狂泉名國人皆飲泉狂顛率無寧一
者自穿汲乃獨能常醒國人既皆狂反見不狂驚顧謂
不狂人無乃鬼物憑不然是狂疾救療當瘞輕施針灼
炷艾膚肉無全平而彼不狂者被虐楚不勝賁然走泉
所酌飲不敢停既飲即亦狂萬慮昏迷冥其狂與衆一
衆始歡相傾世事今亦然嗟哉感詩鳴安得跨鵬背獨
往遊天溟寄謝彼狂子酌泉吾不能

次韻茂永兄首夏新晴

燕落雨知節鳩鳴天欲晴行雲飛斷碧斜日漏微明
上竹三徑苗肥田一成野人知得飽索酒坐班荆

頌茂安兄秀野亭

山作屏風雲作籬岩堯亭子俯漣漪絕知此地風光好
直為主人心跡奇側塞亂花紅被徑檀欒高竹翠緣陂
惠連自喜陪幽賞判却歸時倒接巵

歲暮喜晴

晴山喜見曉嶺笑出蓬門不暇冠風掃斷雲齊萬壑
日融殘雪上三竿早黃楊柳漏春信晚翠枇杷凌歲寒
從此林芳入幽賞凍醪新壓味甘酸

課畦丁灌園

連筒隔竹度流泉約束畦丁灌小園拔薤自須還種白
刈葵輒莫苦傷根爪疇畦擬狸頭大草徑隄防馬齒繁
努力荷鋤當給酒無令菜把乏朝昏

春雪晚晴出西村

步履尋春犯雪泥
村南村北鷓鴣啼
隨梅殘白猶明樹
着柳暗黃初映堤
風景快晴雲擘絮
江天未暮日懸規
最憐碧漲侵沙尾
更傍橫橋一杖藜

送周西美主簿之任祁門

君向祁山去修程
幾日期江天梅子雨
驛路橘花時知
迫循陔養寧辭糾
邑卑美才無不適
驚翮豈棲遲

次韻端臣姪七夕


萬古東西隔女牛
停梭期會豈悠悠
蝦蟇輪破青天暮

烏鵲橋橫碧漢秋。莫放癡兒懽徹曙。且容老子強登樓。
舉瓢更取天漿酌。一洗胸中萬斛愁。

張生夜載酒相過

夜卷一鉤簾。衣寒覺露霑。未驚風割面。且看月磨鎌。
玉枕鵝兒酒。花甌虎子鹽。張公雞黍舊。歡笑了無嫌。

宋詩鈔卷五十二



總校官庶吉士臣張能照

校對官庶吉士臣陳墉

謄錄監生臣孔廣枚

欽定四庫全書薈要

集部

宋詩鈔卷五十三

四

詳校官候選知縣臣吳甸華



欽定四庫全書薈要卷二萬三百六

集部

宋詩鈔卷五十三

內閣中書舍人吳之振編

劉子翬屏山集鈔

子翬字彥沖以父幹任授承務郎辟幕屬幹死靖康之難子翬痛憤哀毀服除通判興化軍事以羸疾丐祠歸隱屏山學者稱屏山先生而自號病翁與籍溪胡原仲白水劉致中為道義交所學深遠朱子受遺

命往遊其門子輦告以易不遠復三言俾佩之終身
一日感微疾即謁廟訣別家人與朱子言入道次第
而歿詩與曾茶山韓子蒼呂居仁相往還故所詣殊
高五言幽淡卓鍊及陶謝之勝而無康樂繁縟細澁
之態則以其用經學不同所得之理異也

涼月

涼月未出山浮雲半空白徘徊步軒窓宛若待佳客經
林漏飛輝映淑生華澤及茲秋景清吾廬更幽寂殊觀

發秘藏妙聽生寥閒營營息初機炯炯懷新得豈無平生心所樂已非昔天旋河漢動夜久鄰機息淒淒感庭蘭歲暮霜霰集呼兒溫濁醪獨酌醉永夕

渡淮

鳴輦渡長淮霏煙散清晨皎皎初日光照耀草木新橫林渡餘碧疊嶂開嶙峋移橈失向背煙波浩無垠兒童相櫂歌余心亦欣欣輕帆互相踰畫鷁映流津徘徊望洲渚悠然獨懷人樵漁有棲遯寂寞誰問鄰暮風翻洪

濤魚蝦亦有神四顧天地黑孤舟恐漂淪

阻風

晚歲多悲風江湖浪崢嶸扁舟渺無依日暮猶孤征重
岡擁滯霧迥隰飄浮雲繫舟古岸邊纜斷舟復橫天寒
鴻雁稀滯留知旅情頽崖震林谷客子心夜驚披衣待
清曉缺月西南明遠遊多所懷益遣歸思盈

建康六感

吳

龍翔大耳免虎視捉刀人風雲競追逐逸軌誰能遵大
皇負英材沈潛歎求伸一呼定南國再戰威強鄰抗魏
既搖岳攘劉亦披鱗組練繞平隰朦朧蔽通津偉哉人
物盛成功豈無因代祀已飄忽風流久彌新停橈眺迥
陸裂蔓登層闔卧龍昔來遊萬古懷清塵

晉

日昃無全照南遷事倉忙龍謠方協瑞星禍已告亡陵
遲百年運凜凜危莫將向來問鼎人項背常相望環宮

白羽列面闕鳴弦張膺圖未躋泰卜世豈在長獨憐短
轅公推刃殺忠良百身嗟莫贖一慟鬢成蒼時移事亦
更為宋復為梁惟有采石潮年年到前岡

宋

寄奴真偉人落拓龍潛地據筵呼五木已有吞世氣世
期值陽九天綱日淪替偏邦或跨州卑號猶稱帝匪乘
艱棘運英姿疇能濟南戡奠番禺西狩澄涇渭功雖與
世隆道亦因人廢緬懷揖讓風黃屋身如寄顏波日奔

迫夜壑遷神器巢由獨賢哉高蹤邈難繼

齊

堯宮不剪茨禹室無崇壤巍巍天步隆萬代猶可仰荒
哉二三君經營務華敞落梯滿清江飛斤殷遙響疏淵
引瀾澳築園遷林莽筋力斃民軀貲財傾國帑雄心獨
未倦矯首生遐想時徂陵谷變無事猶悲曩殷憂易興
懷逸樂難終享過客問青樓荒畦棘一作花長

梁

開圖屬英睿失國由昏悞斯人異前修撥亂旋致亂輕
刑下益肆厚爵臣彌叛聰明馳萬機精苦徒宵旰鳳冕
敬方袍鸞旗游彼岸悠然弃從懷臨機復難斷那知千
佛力不紓一寇難酒色覆商周神仙蕩秦漢超亡固多
軌荒迷卒同貫微聖常鮮終撫冊三慨嘆

陳

悲風嘯荒垣歌斷庭花曲壁月夜沉輝瓊樹春銷馥郊
圻遊從盛想像猶經目麗景明新妝清波映鮮服承恩

屬令姿被選皆華族朝從結綺遊暮向臨春宿意高時
忽謝步遠塗方促榮華事不長哀樂情難足悠悠六朝
事轉盼風驚燭永懷興亡端斯文慚麗縟

夜飲

良宵樂未央促席團欒坐佳人意慙懃唱歌屬余和幽
期貴濶略醉語多叢睚沉沉玉卮酒量淺難負荷豈不
懷極懽恐重賓友過褰帷望明河山月銜半破回軒互
追奔傘拂簷瓦墮

遊朱勔家園

晨暉麗丹楹翼翼帝居向來堂上人零落煙海隅聯
翩際時會振迹皆刑餘閨帷尚帝主阜隸乘軒車流威
被東南生殺在指呼樓船載花石里巷無袴襦至今江
左地風雲亦嗟吁叨榮已過量受禍如償逋荒涼當門
路尚想冠蓋趨客舸維岸柳隣人罾池魚徘徊極幽觀
曲折迷歸途夜月扃綺戶春風散羅裾繁華能幾時喪
亂實感予曹鄴子何譏此曹真人奴

早行

村雞已報晨曉月漸無色行人馬上去殘燈照空驛

老農

山前有老農給我薪水役得錢徑沽酒醉卧山日夕忘
形與之語妙理時見益志士多隱淪欲學慚未識

種菜

傍舍植桑蔬攜鉏理荒穢桔槔勤俯仰一雨功百倍朝
來綠映土新葉搖肺肺牛羊勿踐畦肉食屠爾輩

晨興

晨興訪蕭寺爽氣清如沐坐看雨離山飛陰斷平陸歸
途阻夕漲竚立驚幽獨曳杖聽殘鐘卻寄僧坊宿

下灘作

青山鎖連環白澗度鳴瀨迷津毫髮間舟與危石會回
淵聚浮沫斷壁餘澎湃玩奇心若驚覽鏡自不逮悠然
一回首孤驛已茫昧停橈念經歷履地猶旋憤悲風嘯
枯林暮野雲相益隔船聞和歌沽酒慰疲怠

棄竹夫人

愛憎情易遷感物思鬱紆念昔未棄捐嘗侍君子居煩
襟一披豁雅抱滿清虛蹉跎怨時暮涼德竟見疎飛霜
皓中庭枵然委牆隅的皪珠幃深熒煌錦茵鋪豈不懷
舊恩君心已非初當年紈扇謠抱恨同區區

秋懷

哲人嘆逝川志士悲廩秋流光不暫停忽忽歲欲周涼
飈襲迥野飛霜皓盈疇華林失鮮輝奔谿殺湍流萬化

儻日徂吾生難獨留而我苦不樂彷徨復何求世途多
軌轍今行非昔謀徒遵耿耿意齟齬固莫投時乎不再
來豈余敢懷尤王道炳日星歷聘疲軻丘歸歟既改旆
浩然亦回輶寂寞寧子歌棲遲長卿遊客嘲徒自解天
問終不酬長揖未免烹說難竟遭囚行藏或大謬聖賢
共悠悠含思疚恒積念徃川途脩煌煌青春姿蹉跎恐
茲由諒非宏達觀那能齊百憂

四不忍

草邊飛騎如煙滅
拉獸摧斑食其血
此時疾首念鑾輿
玉體能勝饑渴無
危城屑麴驚雲擾
簋簋無光天座杳
奮戈儻未雪深雱
我食雖甘何忍飽

黃河鑿鑿永成路
人語寒空氣成霧
此時泣血念鑾輿
玉體能勝凜冽無
蒼皇天步蒙塵去
畫袞飄零傷歲暮
飛書儻未伐姦謀
我服雖華何忍御

平沙月轉旌旗影
擐甲為衾戈作枕
此時飲恨念鑾輿
玉體能勝暴露無
問安使者空相繼
清蹕不回宮殿閉

請纓儻未縛仇讎我榻雖安何忍寐

漁陽疊鼓風沙戰潑水淋漓舞胡旋此時太息念鑾輿
玉體能勝寂寞無六宮遭亂多奔迸不復梨園歌舞盛
著鞭儻未蹂龍庭我瑟雖調何忍聽

望京謠

雙鑾北狩淹歸轂寂寞梁園春草綠猶傳故老守孤城
官軍不到黃河曲連雲樓櫓已灰燼更倚窓扉防箭鏃
招兵大半出羣盜綉襦蒙衣屢翻覆前宗後社力誅鉏

白刃如霜挂人肉州橋燈火夜無光夾道狐狸晝相逐
往時汴泗絕行舟市糴十千塵滿斛衣冠避敵多在南
戎馬却食江南粟謀臣武士力俱困海角飄搖轉黃屋
盤庚五遷方擇利昆陽一戰何當卜懸識天心厭亂時
漢祚承天終必復夕烽明處望千門孤臣祇欲吞聲哭
臨池歌

劉致思倦遊復卧故廬有意學書來求石刻因慨然
念昔經行秦洛趙魏間未嘗不回驂駐軫搜訪古跡

故宮遺址豐碑斷碣歷歷相望也吹埃剔蘚考年代之所志訂古驗今識興衰之所自至乃壞壠荒榛微陽霧雨雖暴露濡沐僮僕色難而余躊躇不忍去也奇蹤偉筆多致墨本甚者缺裂模糊不可辨了亦皆摸脫以歸登登之聲殷乎山谷旋歸所獲車載牛負不可勝計喪亂以來汎掃焚劫何止七厄哉今披篋視之十得一二有副本者悉以與致思致思明爽嘗留心字學運筆流快風動草偃固足以軒輊流輩然

未能窺古人藩域者功虧一簣耳夫洞石仆木非蹶
張挽强者所能用志不分乃凝於神梓慶削鐻病癘
承蜩皆此道也致思充是而學焉余不知其所至矣
因作臨池歌以堅其志切切俛俛亦朋友之義也

君不見鍾繇學書夜不眠以指畫字衣皆穿當時尺牘
來鄴下錦標玉軸爭流傳又不見魯公得法屋漏雨意
象吐吐凌千古斷碑零落翠苔封直氣英風猶可覩元
常獨步黃初際清臣後出今無繼風神迥處一作本天

資巧力亦自精勤至羨君好尚何高竒寒窓弄筆手生
胝向來失計墮塵網銳氣直欲摩雲飛男兒舌在心何
忤卻擬臨池尋舊學要須筆外見鍾顏會自蛟龍生掌
握銀鈎石刻余何愛勸以短歌君勿怠他時八體妙有
餘此歌儻可君紳書

和李吳伯春懷

山寒古寺清斷續春朝雨遙憐遠客情寂寞誰晤語平
生氣軒昂失意今易與有酒即佳晨無兵皆樂土微吟

對節物林靜幽花吐悠悠念鄉邑耿耿悲豺虎知有濟
時才從橫在談麈功名恐未遲老翮期更舉

明皇九馬圖

書生兀兀園不窺見馬豈辨騮與騅開圖九駿立突兀
摸捺知是真龍兒奔雷蹴踏原野動曳練參錯風沙隨
華纓金絡豈不好矯首奮迅那容羈吾聞取驥如擇士
競愛妥帖驚權奇士懷倜儻衆論斥馬有顛顚羣駕欺
六閑養養固恩厚橫氣摧折常鳴悲丹青儻不逢妙手

萬世豈識真龍姿因思中原政格鬪鐵騎倏忽銀山移
著鞭安得致此物掩畫四顧徒歔歔

怨女曲

空原悲風吹苜蓿忽看飲馬桑乾曲誰家女子在氍毹
嗚嗚夜看星河哭黃金為閨玉為字平生不出人稀覩
父憐母惜呼小名擇對華門未輕許干戈漂蕩身如寄
綠鬢朱顏反為累朝從獵騎草邊遊暮逐酋王沙上醉
西鄰小姑亦被掠貧賤思家心更苦一身只有嫁時衣

生死同為泉下土出門有路歸無期不歸長愁歸亦悲
女身軟弱難自主壯士從姑不如女

巡寨偶書

窮寇轉趨海吾邦備宜先連年戍役頻徵兵及漁佃扶
戈或稚齒嬰冑仍華顛未知戎伍肅朱旗亂長阡林端
晚燧發石際飛梯懸崎嶇樵牧地萬竈生浮烟我行視
營柵兒戲端可憐倚茲形勢險寇至常遷延羣克昔吾
軍赤指抨鳴弦防邊屢瓦解合寇俄星連猶多燕趙兒

意氣非當年駢車載珍寶結騎馳嬋娟時危天稔亂事
豈汝能專怒風飛驚濤河梁失歸船四顧天地黑攬衣
思茫然

負暄

宵寒卧增裯晝寒起增衣何如負暄樂高堂日暉暉引
光扉盡闢追影榻屢移妙趣久乃酣瞑目潛自知初如
擁紅爐凍粟消頑肌漸如飲醇醪暖力中融怡欠伸百
骸舒爬搔隨意為稍回驕佚氣頓改酸寒姿薰然沐慈

仁天恩豈余私願披橫空雲四海同熙熙
矯首望扶桑傾心效園葵

木犀古風

化工吝幽香斑斑被花木氤氲寒巖桂高韻益羣馥
無人盡日芳守志何幽獨士介耻求知女貞慙自鬻
淒涼楚山秋樛枝吐金粟淺水映輕明微飈發含蓄
樓端靜忽聞馬上遙相逐踟躕為延佇但見林巒綠
鉅罌誰折贈清芬闕廬屋久處不自知乍至彌鬱郁
客悲芳歲暮

夢遶寒溪曲長吟小山詞古意恐難復

食蠓房

蠓房生海堦堅頑宛如石其中儲可欲雖固必生隙嵌
巖各包藏礧礧相附積中逢霹靂手妙若啓扇鏹鑽灼
諒難堪曷不吐餘瀝南庖富腥盤豈惟此稱特吞航大
絕倫梯鬻萬夫食針鱗九牛毛小嚼逾千百光螺暈紫
斑蠓膏湛金色水母脆鳴牙章舉懸疣密烏黏力排鼻
貼石不可索妾魚戲浮波媚鮐雌雄匹蟹殫輒橫鶩黿

縮常畏出車螯不服箱馬鮫非駿迹江瑤貴一柱嗟豈
棟梁質骨柔競愛鱖多鯁鮓乃斥蚶虹鮭赤文肉黑魚
之賊鰈鰾鯉鰻鱸鮓鰕鮐鮒庸而劍小瑣冗難盡
述包涵知海量長養荷天德貪生族類繁失地波濤窄
網罟人創禍甘鮮已為厄紛然均可口流品當剔白微
物倘見知捐軀不足惜

諭俗十二首

故園喪亂餘歸來復何有鄰人雖喜在憂悴成老叟為

言寇來時白刃穿田畝驚忙不知路夜踏人屍走屋廬
成飛煙囊橐無暇取匹夫快恩讐王法誰為守艱難歷
冬夏遷徙徧林藪深虞邏寇知兜啼扼其口樹皮為衣
裳樹根作糧糗還家生理盡黑瘦面如狗語翁翁勿悲
禍福較長久東家紅巾郎長大好身首荒荒死戰場頭
白骨先朽

西村人漸歸撐拄燒殘屋東村但蒿萊死者無人哭昔
茲號富穰被禍尤殘酷二三里中豪喪亂身為僇遺骸

悵莫掩饑飢啄其腹豈無平生時意氣凌鄉曲錐刀剥
微利舞智欺惇獨錦囊收地券奕葉相傳續只今鄰叟
耕歲歲輸官穀爾曹何顓愚人生固多欲

何州無戰爭閩粵禍未銷或言殺子因厲氣由此招蠻
貊地瘠狹世業患不饒生女奩分貲生男野分苗往往
衣冠門繼嗣無靈髻前知飲啄定妄以人力僥三綱既
自絕餘澤豈更遥王化久淘漉刑章亦昭昭那無舐犢
慈恩勤愧鴻鵠冤報且勿論茲義古所標

愚氓擾潢池黠難亦常態簪紳有包藏事異吁可怪豺
聲久伺亂鯨戮終何悔游言張兇焰巧謀移機會初如
卵殼微跣踐悉糜碎養成羽翮雄飛掣韝繩外翦鉏淹
歲月螫毒彌疆界向來詰端由罪白不容蓋南冠囚載
路東市誅其最隆寬俗與新僥倖汝勿再

野人厭羹藜家有庖丁刀徒誇批導手官念耕稼勞隱
然肉山雄畏彼尺箠操春泥卧寒野夜月犁東臯辛勤
力已盡穀棘禍豈逃誰無惻隱心鮮能勝貪饕蓋惟猶

示恩况異犬馬曹

扇馬嚴內仗貂璫侍宸閣哀哉里閭間刁閹逮雞豚放
麀識忠藎母卯著格言矧利肥甘軀絕其孳息源難銷
愛欲心物物天性存逆情氣必戾順化生乃蕃誰開口
腹謀無乃傷仁恩

粵人多悍驕風聲亦惟舊兒童僅勝衣挾箠相格鬪藝
精氣益橫質化心忘陋家饒喜稱俠世亂甘為寇豈伊
天性然習俗所成就吾聞互鄉童翱翔聖賢園隱豹弄

爛斑攻駒發馳驟佩觿爾何知義方得無謬

村南井欲乾曉汲盈瓢濁飲濁不足言奈此田畝涸
啞龍骨響煥爛陽烏虐良農無他營辛苦事東作春苗
何葱芊秋刈何稀薄我雖食有餘念彼心不樂乞靈走
羣祀晚電明霍霍屯膏竟未施天意自難度

震雷霹枯松頑龍失其據浮雲三日雨盈畝復地注商
羊舞未休旱魃消何遽稍寬人心切仰荷天恩布稻畦
裹連顛接穗給朝飫菜畦擢新萌蕩滌死羣蠹歲儉民

怨咨時豐家悅豫青青寒芳色亦復貪雨露

茲鄉山水佳昔乃為盜窟吾廬已煨燼荒草牆兀兀牆
東大梨樹惟此為舊物火燒枝葉盡老本更奇崛衆鳥
罷高樓空庭失清樾鄰兒利薪爨往往肆戕伐豈知昂
霄勢長養自毫末寒堤孤碓在廢圃鳴泉出衝茅且經
營霜霰莫倉猝

未須葺吾廬且復脩吾倉求安當卜居求飽當聚糧營
生力有限先此計頗長去年稻盈畦避寇不得將新芽

雨後白卧穗霜中黃鰓惻有饑色冠釁餘稻梁解衣易
升斗糠粃隨風揚休嗟昔艱難喜茲歲豐穰鄰翁為人
耕貯粟不盈箱溪頭廩與困累累已相望

縣牆挂德音盡弛今年租旣發懼謠助達和氣舒皇
恩施甚厚疲瘵望少蘇吁嗟吏舞文詔紙墨未渝借貸
盡白著勾稽窮宿逋拮克儻歸公民貧猶樂輸量權徵
倍耗蚩緣竊其餘寧逢盜剽攘厭聞吏追呼盜姦久必
戢吏姦無由鉏雷霆不言威肉食忍自誣故態勿狙習

窮閭勿侵漁勿謂天聽高勿謂黔首愚

清江行

漁翁一棹老清波稚子學語能漁歌日暮沙頭寒熟竹
雨餘船角亂堆蓑鬻殘小鮮仍自鱸湖海茫茫醉鄉內
夜闌酒渴漱寒流月照蘆花上蓬背

聽詹溫之彈琴歌

鳴琴藝精非小道可惜溫之今已老玲琅一鼓萬象春
鐵面霜髯不枯槁自言寡知音求我為作歌號宮韻角

可聽不可狀錦腸綉舌空吟哦吾意其一氣之濁清兩
曜之晦明山河之結融雷霆風雨之震驚包羅具七絃
開闔造化由人心又疑夫堯禹之躬行丘軻之立言瞿
聃之同歸百家諸子之紛然更歷千萬古此意不滅絲
桐間滌除浮慮清蕩摩愁襟開琴之氣象廣莫有如此
欲媚俗耳知難哉寒缸燒涸夜向闌罷琴歸矣我欲眠
夢跨氷輪出瑤海一笑碌碌瀛洲仙

雲際會劉到致中

紅綃千樹桃雪殺萬株李
柘葉青青如鼠耳橫山渡口
浪成堆認得劉郎船子來
物情時事不須說且喜新歲
同銜杯少年鼻哂輕流俗
斂銳收豪今碌碌敝裘常帶
客塵緇雙鬢不如春草綠
東風吹愁入我心使成嘯嘆
成悲吟問君底事久留此
蜀不聯鑣歸故林

懷舊歌

黃茅生烟暗村落浩歌無復當時樂
鄰家酒熟逆鼻香
一醉乾坤墮冥漠尋芳屢過垂玉軒
又魚夜上浮清閣

鬪牌擊鼓多伎倆我獨旁觀惟大噓驚烽入座懽難保
幸得身存他勿道吾宗潛武卧空棺衮臣兄弟埋荒草
當時醉舞向花下綠鬢朱顏各鮮好隙駒風燭尚須臾
數子凋零不待老死生細事從渠天莫學兒女相哀憐
一窓容膝可終隱寇盜擾擾今連年王師誅鉏有漏網
死灰焰焰猶思然憂煎過計祇自惱且但努力耕吾田
夜過王勉仲家宿酒數行為作此歌

遙林帶雪迷村疇伶俚一馬行無伴故人家住丁坂頭

停驂邂逅成清款
犯寒知我猶空腹
地爐然薪架紅玉
花瓷湯酒欲生香
竹外庖厨聞剝肉
夫君不有中饋賢
咄咄辨此何神速
酒酣意氣悲荆棘
尚憶朱甍舊時宅
豺狼得志竟何成
至今人骨如霜白
亂離少有闔門在
漂蕩俄驚五年隔
數畝荒田已失耕
一間茅屋仍留客
客情主意懽難盡
短臘窮冬春欲近
明朝分手更愁人
且覆清觴莫留賸

夏日吟

君不見長安公侯家六月不知暑扇車起長風冰檻漚
寒雨重櫺窻屋晝生陰反易天時在談吐又不見武陵
富豪免炎天多快意雪縠曳輕明珍饈嚼甘脆蛾眉皓
齒發清歌灑酒筠枝集蠅蚋何如野客歌滄浪萬事不
理心清涼流金礫石未為苦勢利如火焚中腸

海棠洲

煌煌海棠洲錦樹臨清灣常恨灣頭風吹花走潺湲潺
湲去不息花亦無由還

懷新亭

茅簷入竹低，曠野時寓目。
寂寂農家春，新秧滿田綠。
何時稻登場，秋山響蓬櫟。

宴坐巖

青青梔樹林，下蔭蒼蘚石。
幽人宴坐時，懷抱忘其適。
不見暮樵歸，寒山雨中碧。

南溪

聊為溪上遊，一步一回顧。
悠悠出山水，浩浩無停注。
惟

有舊溪聲萬古流不去

兼道攜古墨來墨面龍紋墨背識云保太九年奉
勅造長春殿供御龍印香煤旁又識云墨務官
臣庭邽監官臣夷中臣子和臣卞等進蓋江南
李氏物也感之為作此詩

長春殿古生荆薈猶有前朝遺物在錦囊珍重出玄圭
雙虬刻作蜿蜒態枯皮剝製弄幾剗斷玦精堅磨不殺
吾聞李氏據江左文采風流高一代當時好玩不獨此

器用往往窮奢汰徵工選技填御府不惜千金為賞賚
治兵唐推英衛精治民漢許龔黃最惜哉取士不知術
妙手獨得庭邇輩真主驅馳八極中荒王逸樂孤城內
汗青得失更誰論尤物競為人寶愛嗟余視此真糞土
事有至微猶足戒投文欲往吊江流幽魂未泯應慚悔

劉蕡道獵

劉侯好獵親馳逐指呼雙犬如奴僕朝衝唐石亂雲來
暮聽溪潭流水宿何如著鞭走大梁我亦與子同翱翔

今年獵叛醢彭越明年獵冠羝德光

觀二劉題壁

溫其題詩新歷寺落筆風雨驚長林眼高一世常欲罵
想見掀髯坐巖陰致中題詩新興寺壞壁歲久莓苔侵
山僧好事亦可喜解誦鳥啼春意深我來經覽渾如昨
玉友金昆念離索投林倦翼不同棲况復分飛在廖廓
故山終勝他山好新交不如舊交樂何況把酒問鷗盟
卧聽松風同一壑

攜筇

晨起偶無事攜筇出潭川翩翩雙鳬飛宛若尊我前林
靜滴殘雨村深澹寒烟當春足膏澤俯夏餘清妍野溜
綠交貫山花紅接連雄觀發新奇勝地窮攀緣據石弄
驚急班荆蔭連卷幽懷脫塵拘如超混茫先向令作興
來未必勝偶然榮觀事多乖內取樂乃全他時誰繼遊
此意遙相傳

橫秋閣

秋山萬尺青影落杯酒中登臨豈不佳寒色見遠空未
忘天下憂邊塵起西風

百花臺

森沈徑易迷揶揄為徘徊何處春光多時登百花臺主
人澹無情林花為誰開

清湖驟雨

快雨不相期平湖忽蕭颯坐久日明簷繁聲靜中滅

寄彭子靜

凍岫立高白曉寒生太虛閉門翻巾帨偶見良友書書
中有長句別懷陳鬱紆吐鳳詞既絕續貂理難如起望
新鄉雲一讀三卷舒繁思攪中扃賴此豁欲無鵠雞有
潛化蓬麻豈資扶吾人交義深不恨相見疎但恐德不
修心期愧非初

夜行潭溪上念仲原致中喬年茂元伯達皆有入
山期以詩趣之

長夏不見雨祥者故相病及茲顛氣回一夕飛灑併攬

衣步新涼宇宙涵河潤月離南山高水循雙澗靜流觀
外既洽至樂中潛應緬懷平生友契濶時光運石峰許
尋盟有約殊未定事紛莽如塵欲掃那得盡年衰覺世
浮慮澹知心勝良遊莫蹉跎小暇即乘興

讀曾吉甫橫碧齋詩

攜鉏引荒泉偶步松岡北冷然毛骨清楚尾見秋色稻
氣馥初涼檉陰淡微日緬懷小齋居櫺檻增岑寂曠度
滅知聞微吟數峰碧若人端好修珍駕動無迹深窮伊

水源峻陟衡山極終焉憩孔林所樂惟自得延和數酌
醪侑靜一編易向來辱傾輸洞見胸中白思親道匪侔
既遠情不懌矧余質冥頑固未易刻畫尊生有遐心克
已無全力以茲畏所知負負常夕惕餘波儻時漸玉汝
天其或

同汪正夫行夫望鄱江

夜夢鄱江清曉踏鄱陽縣雲濤著眼新還疑夢中見寒
聲彭蠡合凍色廬峰現時方冬氣深水縮川原變連沙

突堆阜派港分組練蕭蕭蓬髻風瑟瑟段叢霰竒觀信
幽絕領略殊未徧何當烟艇高載我行鏡面二難今勝
流賓客移清燕飲酣生泰和語妙融交戰衰遲百不堪
一快天與便回筇晚霽中路壓滄浪轉波光似流入隨
裾蕩華綯

呂居仁惠建昌紙被

寒聲晚移林殘臘無幾日高人擁楮眠攣卷意自適素
風含混沌春煦回呼吸餘溫偶見分來自芝蘭室乍舒

魄流輝忽捲潮無迹未能澡余心愧此一衾白嘗聞肝
江藤蒼崖走虬屈斬之霜露秋漚以滄浪色粉身從泮
紕蛻骨齊麗蜜乃知瑩然姿故自漸陶出洽物猶貴精
治心豈宜逸平生感交遊耳剽非無得精神隨事分內
省殊未力寸陰捐已多老矣將何及自從得此衾夢覺
常惕惕清如夷齊鄰粹若淵騫覲獨警發鏗鉤邪思戢
毫忽勿謂絕知聞虛闐百靈集鼎鑊或存戒韋弦亦規
失則知君子惠所以勵蒙塞

雲巖竹源二禪俱與招客三月二十一日遂飯于
竹源庵謀諸野則獲也劉奇仲有約不至吳周
寶遊德華劉致中暨公望劉才仲陳聖叔某會
焉從容辨論懷抱甚適因賦詩以紀之

雲巖市聲中竹源山色處平生幾兩屐惟樂取意去晨
光霽老春飛蓋雙溪路沙平水漫流雲散天全露逶迤
經淺坂窈窕穿崇樹綠登方怒舒紅竟忽繁雨斯焉得
小休境熟來已屢徵君常主盟呼吸名勝聚子休心鐵

石太叔語韶濩鼎興劉陣俱有不凡度余衰氣不華
清遨慚輒與未渠推遠之政以朽然故九賓既雲集一
士乃鴻翥毋多溷幽人蔬茗煩草具叢談雜莊謔泛閱
披黃素豐鑄辨活筆始畫窮真數解衣半日許萬古懷
胸臆西窓引虛明汎灑延晚步嬾身厭依隨靜若超羈
馭博山真起予浮煙一枝驚

同范智聞五月十四日夜賞月

微風淨郊原暮色含清夏層巔月欲上烟烟木葉罅豐

姿一髮虧爽氣千毫射流光不著地黃抹溪西舍翩然
釋嶠飛雲浪鱗鱗化常恐螺髻青失此驪珠挂用借奇觀
天所吝老眼得屢借不嫌神太清跣立高梧下故人肯
留連一笑偶良夜濁醪勿虛杯庭縞醉可藉

宿省軒

夜空合一寂擾擾息萬勞幽懷耿不寐孤燈側殘膏稍
知山雨來聲在橫林高淒然卻成夢夢泛秋江濤

過報德庵

循溪踏危磴路入篔簹塢森森翠樯間一幹橫清雨茶
煙日月靜石壁軒扉古盡茲北山旁小勝無遺取

次韻茂園獨速歌

大兒行文學蘇黃暗潮無聲走茫茫小兒分題擬甫白
手抉墓頤取冰魄自成機杼誰如君悲歌乃有可憐色
曉來春歸薺葉新青女摧之良不仁那知妙齡氣如許
一晚辟易驚千人我亦歸為村衰翁接花成條歌屋紅
跣行肯追蹠躩步杯飲不羨琉璃鍾相逢他事不發語

醉面徹日承谿風君不見豐碑模糊立峴首又不見總
帷虛斟百眉侑何如吾儕見在身有口猶堪著醇酎陶
陶兀兀未全非赫赫炎炎豈長有硯峰絕頂撫孤松伊
誰致此蒼髯壽

韓幹畫馬闕四足龍眠榻而全之

吾聞兩臂天下重馬失四蹄將底用平生想似萬里逝
對此惟心惻然動得非曾落駑駘羣蹠脫泥塗良已勤
又疑逸氣厭拘係絕蹠徑欲超浮雲諦觀事乃不爾劇

破練丹青老無色軒昂自有尊足存顧盼一株陰山碧
韓生筆法妙此圖龍眠榻出了不殊斷鰲自昔徒聞說
續鳧雖工計已疎何如染作滄江遠明滅要看追風蹴
微雪

寄魏元履

世情事虛文十幅了一書片言到肺腑子獨不佞予班
班眼中秀學膽誰似渠平生幾兩屨踏破牛斗墟小言
謁侯門大言叫天都歸來闕存室默坐追亡逋牀頭著

韋編盤礴萬古初時拈紙上語破的妙有餘已甘耐對
難舌本噤不舒矧予在半流所見方模糊蝸涎不自潤
詎敢相濡濡人生強多知於已固已疎睫邊遺太極意
上町六虛獰猿繫尚跳況乃拊檻呼是神非吾神滓穢
政可奴嘗聞不遠復佩作三字符煌煌杏壇春一枝明
清湖蜂蝶未全知佳處自不孤惟子先著眼時來採芳
腴何當共叩微歸性有順塗

新涼

新涼為招客勝集非預圖前峰雨未散冷風遶吾廬披
襟沐清駛合席隨霑濡定知喧譁中欲此一快無興來
擴以酒草具來須臾田翁偶過我添杯坐其隅為言秋
暑劇稻畦日凋疎寧辭抱甕勞僅給園中蔬喜茲甘澍
足普潤無遺墟遙山莽難分綠浪搖虛徐我病不任耕
歲收仰微租蒙成每自愧一飽便有餘連觴使之醺醉
語雜叫呼野人無他腸我輩恐不如

吳傳朋游絲帖歌

園清無瑕二三月時見遊絲轉空濶誰人寫此一段奇
著紙春風吹不脫紛紛紆糾結疑非書安得龍蛇如許癯
神蹤政喜縈不斷老眼只愁看若無定知苗裔出飛白
古人妙處君潜得勿輕漠漠一縷浮力道可罈千鈞石
睽予弟兄情不忘軸之遠寄悠然堂謝公遺髯凜若活
衛后落鬢搖人光翻思長安夜飛蓋醉哦聲落南山外
亂離契濶三十秋筆意與人俱老大政成著脚明河津
外家風流今絕倫文章固自有機杼戲事豈足勞心神

傅朋王逢
源外甥也

病中賞梅贈元晦老友

梅邊無與談，賴有之子至。荒寒一點香，足以酬天地。天地亦無心，受之自人意。韜白任新和，風味要如此。

過鄴中

逐鹿營營一夢驚，事隨流水去無聲。黃沙日傍荒臺落，綠樹人穿廢苑行。遺恨分香憐晚節，勝遊飛蓋尚高情。我來不暇論興廢，一點西山入眼明。

望楚

客浦舟凝滯，凭高識楚鄉。
有愁闕眺覽，何地不淒涼。
草木詞人怨，江山霸主亡。
悠然獨搔首，暮靄一星光。

井泉

石井水濺濺，寒莎映碧鮮。
雨聲添溜急，天影入波圓。
曉汲連山寺，春耕潤野田。
杖藜三嚙罷，毛髮更蕭然。

巖桂

涼颼振遠村，寂寞度清芬。
山路不知處，月窓時夜聞。
孤

根寒抱石落子半飄雲袖手空延佇無才可賦君

新灣

苒苒寒生水面煙吳歌唱罷月微偏停橈又向灣前宿
一夜西風浪打船

汴堤

參差歌吹動離舟宮女張帆信浪流轉盡柳堤三百曲
夜橋燈火看揚州

天迥

天迥孤帆隱約歸茫茫殘照欲沈西寒鷗散亂知多少
飛向江頭一樹棲

銅爵

金碧銷磨瓦面星亂山依舊遶宮城
路人休唱三臺曲臺上而今春草生

中渡

渡南渡北是長亭沙上行人立馬情
回首若無烟樹隔只應猶望見高城

江上

江上潮來浪薄天
隔江寒樹晚生煙
北風三日無人渡
寂寞沙頭一簇船

雙廟

無復連雲戰鼓悲
英風凜凜在雙祠
氣吞勅敵方張日
恨滿孤城欲破時
幽鳥自啼簷際樹
夕陽空照路傍碑
平生不作脂韋意
倚棹哀吟兩鬢絲

安仁道中

汨汨復汨汨著鞭雞一號老身緣底急長路只徒勞石
亂春溪惡山深曉月高村沽得微醉猶足張餘豪

酴醾

顛風急雨退花晨翠葉銀苞照眼新高架攀緣雖得地
長條盤屈揔由人橫釵數朶開猶小撲酒餘香韻絕倫
唯有金沙顏色好年年相伴殿殘春

海棠花

幽姿淑態弄春晴梅借風流柳借輕刺種直教圍野水

半開長是近清明幾經夜雨香猶在染盡胭脂畫不成
詩老無心為題拂至今惆悵似含情

策杖

策杖農家去蕭條絕四鄰空田依壠峻斷藁布窠勻地
薄惟供稅年豐尚苦貧平生飽官粟愧爾力耕人

疊嶂

益遣歸心快愁霖喜乍晴樹陰迎馬合波影照人清不
見雲山路時聞樵斧聲暮雲偏自急相伴隔溪行

野步

野步忘歸遠春心不自休
管弦非老伴風雨定花簷
柳暗深深路溪寒小小樓
謝娘歌白紵此意可忘憂

送原仲之荆南

風急塵埃滿漢關送君行處路漫漫
不知爭戰幾時定常恐別離相見難
三逕舊游松竹老五湖新隱水雲寬
交朋日覺知音少綠綺從今莫浪彈

景陽鐘二首

景陽鐘動曉寒清
度柳穿花隱隱聲
三十六宮梳洗罷
却吹殘燭待天明

一刀殘月淡觚稜
遙望林梢曉色升
寂寞小簾風露冷
玉盆脂水已生冰

泊舟

莽莽荒茨岸
回回亂石灘
雨寒收市早
風急泊舟難
寓縣兵猶鬪
乾坤網正寬
慙慙囑龍劍
莫久卧波瀾

次韻張守壺山詩

松根繫馬望巔岼乘興攀躋不作難日出漸看林霧散
潮來先覺海風寒遙連釣石多紅樹半出僧垣盡綠竿
不見雙旌來視稼憶君對酒豈能歡

莫田

打麥蓬蓬響莫田兒童拾穗笑爭先市頭米價新來減
一醉瓷甌五六錢

途中

小市猶依海橫橋欲跨汀雨餘裕徑冷春晚亭田青薄

宦低豪氣浮生惜壯齡
急流歸亦好憂患飽曾經

次張守韻二首

促席山堂夜寒燈吐碎金
酒分鄰甕美栗爆地爐深
疎嬾難堪事紛華易壞心
自憐貪寸祿雙鬢老侵尋

瓦白霜封縞波清月漾金
析沈秋壘靜人語夜堂深
故國歸何日寒衾事滿心
庭松憐手植擢幹已彌尋

悼李奉

選拔由親衛時危遠出征
氣驍嘗忽敵身歿始知名
故

妾辭空帳殘兵隸別營傷心豺虎窟冒險爾何輕

次韻陳成季郡會

疾雨狂風恨若何芳晨坐覺等閑過惜花意欲春常在
對酒年來飲不多雅會欣聞珠履集新詞好付雪兒歌
風流閤老推前輩喜客溫顏似醉酡

出郊

路轉囊山北扶輿憶舊過乾坤征戰久游宦別離多瘴
樹餘紅葉春江又綠波平生豪橫氣未老半消磨

偶書

風急邊塵暗九州岸巾長嘯一登樓故園却憶桐孫在
薄宦端為荔子留湖海以南兵尚鬪仇讎不死禍難休
似聞推轂皆飛將盍有清談謝傳流

與原仲至交溪橋

倦憩春橋午回環翠碧重亂溪流背海新柳色欺松厭
市常思野為官不及農喜逢湖上客談話得從容

春望

杳杳盡寒色乘高望更迷
曉晴山氣上春漲野橋低
幽鳥啼無伴閒花發欲齊
幾多沉寂景醉筆為提撕

北風

雁起平沙晚角哀北風回首恨難裁
淮山已隔邊塵斷汴水猶穿故苑來
紫色蠅聲真倔强翠華龍袞暫徘徊
廟堂此日無遺策可是憂時獨草萊

原仲溫其彥藻彥符致明集敝廬

清樽勸客且留連亂後相從亦偶然
三徑生涯鄉社裏

一秋心事菊花前向來憂喜皆陳迹老去光陰逐斷弦
懷抱故人今有幾只因情話可忘年

宿雲際偶題

穀雨都無十日間落紅棲草已斑斑曉烟未放屋頭樹
春漲欲浮天際山翠蓋縈風沈遠坂漁舟驚浪落前灣
鐘聲認得林邊寺歲歲籃輿獨往還

客路

客路經春雨淹留未得歸徑泥黃染屨林霧白侵衣直

氣何由吐愁心只欲飛東風如解事吹夢落漁磯

哭呂倅

瞑目荒山裏攜家萬里來旅瑩猶借地兒哭不勝哀裂
甌妖難測藏舟事可猜大賢應有後天道信悠哉

秋意

又見庭梧一葉飛物華心事兩差池百年未半老相逼
四序平分秋獨悲過岸山川雲漠漠殘燈院落雨絲絲
客懷料理須杯酒哭向窮途定是癡

屏跡

屏跡山樊避世喧
晚風落日靜柴門
寒泉遶竹通幽圃
小徑穿田入別村
散策微吟霜葉脫
鉤簾宴坐碧雲翻
閒中興味知何晚
絕口名途不更言

絕句二首

目送孤鴻獨倚樓
晚風吹淚更橫流
萸花落處蠻烟碧
六十三程是白州

竹遶茅簷水遶階
東風漸欲放春回
丁寧紅紫休爭發

待取山南刺史來

寄蜀

有客傳歸信愁懷得暫寬
兒童占鵲喜鄰里借書看
離蜀秋方半浮湘歲欲闌
柴門頻灑掃夢想見征鞍

野墅

野墅驚秋晚殘年忽忽過
海潮通井淺林日到窓多
酒盡鄰翁餉詩成稚子哦
人生行樂耳軒冕奈余何

汴京紀事二十首

帝城王氣雜塵氛，冠亦何知屢易君。
猶有太平遺老在，時時洒淚向南雲。

玉璽相傳舜紹堯，壺春堂上獨逍遙。
唐虞盛事今寥落，盡卷清風入聖朝。

聖君嘗膽憤艱難，雙蹕無因日問安。
漢節凋零邊地濶，北州何處是通汗。

朝廷植黨互相延，政事紛更屬紀年。
曾讀上皇哀痛詔，青躬猶是禹湯賢。

聯翩漕舸入神州
梁主經營授宋休
一自憑陵來飲馬
春波惟見斷水流

內苑珍林蔚絳霄
圍城不復禁芻蕘
舳艫歲歲衝清汴
纔足都人幾炬燒

空嗟覆鼎誤前朝
骨朽人間罵未銷
夜月池臺王傅宅
春風楊柳太師橋

御路丹花映綠槐
瞳瞳日照五門開
吾皇欲與民同樂
不惜千金築露臺

神霄宮殿五雲間羽服黃冠綴曉班詔許羣臣親受籙
步虛聲裏認龍顏

宮娃控馬紫茸袍笑撚金丸彈翠毛鳳輦北游今未返
蓬蓬艮嶽內中高

篤蓐清香步障遮並桃冠子玉簪斜一時風物堪魂斷
機女猶挑韻字紗

萬炬銀花錦繡圍景龍門外軟紅飛淒涼但有雲頭月
曾照當時步輦歸

雲芝九榦麥雙歧
盍有嘉生瑞聖時
玉殿稱觴聞好語
時教張補撰宮詞

橋上遊人度鏡光
五花殿裏奏笙簧
日曛未放龍舟泊
中使傳宣趣鄆王

天廐龍媒十萬蹄
春池蹴踏浪花飛
路人爭看蕭衙內
月下親調御馬歸

盤石曾聞受國封
承恩不與幸臣同
時危運作高城破
猶解捐軀立戰功

梁園歌舞足風流美酒如刀解斷短愁憶得少年多樂

事夜深燈火上樊樓

倉黃禁陌夜飛戈南去人稀北去多自古胡沙埋皓齒

不堪重唱蓬蓬歌

上蓬字
上聲

河漢如雲掃沈寥登東寒鐵響清宵竹窓驚破高人夢
門外駸駸萬馬朝

輦轂繁華事可傷師師垂老過湖湘縷衣檀板無顏色

一曲當時動帝王

題將軍巖

昔年棲險人何在
髣髴樓臺杳靄間
事去長空飛鳥沒
時清宴坐一僧閒
霜秋石壁黃金樹
月夜雲濤碧玉灣
杖策時來訪竒絕
漁樵幽興自相關

訪原仲山居

寂寂臨湖屋
湖風為掩門
鳥聲幽谷樹
山影夕陽村
好
事長留客
雖貧亦置樽
平生枯淡意
去此欲誰論

有懷十首

滿空寒雨雜飛煙湖上先生擁褐眠借問茅齋客客否

夜燈相伴讀韋編

胡原仲

結茅同隱水雲間何日柴車不往還憶得松林長嘯罷

歸時明月徧秋山

劉溫其

山空墜石咽寒溪雨濕浮雲晚更低不見蕭屯劉處士

年年清夢遶瓜畦

劉致中

當年冊府仰才華一跌青雲萬里賒白首却來蓮社裏

幅巾緇褐誦楞伽

鄭向明

風驚枯葺白花浮欲下橫橋晚更留惆悵不逢吳季子

一溪寒水帶烟流

吳公路

青錢學士妙文章便合含毫侍帝傍寂寂閩山餘舊隱

憶君時到讀書堂

張巨山

松底柴門盡日關主人西去幾時還長鑣委地黃精老

時有寒猿嘯硯山

傅茂元

馬蹴浮埃去路長相逢端欲問行藏未饒赤壁風流在

且向何家醉碧香

周元仲

翁侯滿腹是精神三謁金門計未成却跨蹇驢游雪上

秋風雄劍匣中鳴

翁德功

曾訪高人上翠峰至今清興逐松風籃輿夢想行山處

白葛花開細雨中

密庵

送六四叔之茶陵

底用怱怱便據鞍離觴縱滿不能歡瀟湘萬里客愁遠
鷓鴣一聲春事闌此去宦遊當益顯時來功業自非難
似聞幕府資奇畫好借雄風弄羽翰

同詹明誠傳茂元游晞真館有感因次其韻

橘柚垂紅古觀秋歸途邂逅得尋幽
暗沙散策隨山遠
夜月回船信水流勝處無詩端可恨
他時有酒更來游
相陪二妙平生友老矣襟期共一丘

邃老寄龍涎香二首

瘴海驪龍供素沫蠻村花露挹清滋
微參鼻觀猶疑似
全在爐烟未發時

知有名香出海隅幽人得得寄吾廬
明窓小熟跏趺坐

更覺胸懷一事無

次韻溫其元日詩

曉來飛雨挾風顛
洗出韶容換故年
花動一紅明屋角
山寒亂碧到樽前
病如夜鶴孤還警
老似春蠶飽即眠
賴有故人開寂寞
錦囊詩句許時傳

次韻熊叔雅七言

只今飄蕩賈長沙
來往三山躡絳霞
馬上新詩猶憶友
枕邊幽夢不離家
風驚枯葦連汀雨
霜著寒楓滿樹花

却記梁園都識面干戈豈料落天涯

謝劉致中瓜

萬言不直一杯水才似謫仙良可嗟
顧我小詩偏發市年年博得蕭心瓜

分茶公美子應預為白曬之約

夢裏壺山尋二妙不因荔子鬢絲華
聊分茗盃應年例故有筠籠來海涯
鮮苞尚想妃子笑槁面何取西施艸
老饒惟作耐久計一瞬紅紫真空花

致中招原仲游武夷

病暑冠裳與體忘一塵幽僻得深藏微風時度澗光活
殘日忽無山氣涼但想子綦方隱几終慚南郭謾連牆
何時九曲尋幽事船尾應須著漫郎

同才仲入山有懷奇仲

客至那容嬾牽筇入翠羅山光知雨過野色見秋多妙
語時相奪微吟只自哦吹埵來獨晚此日恨如何

次六四叔青字韻

寫出吳中勝平生歷歷經路窺烟渚靜山入柁樓青老
氣何由逸奔暉不肯停北潭搖夢否綠面照軒櫺

時中良弼茂元慎儀集水閣

水色兼山影漂搖小閣西風來幽囀活雨過萬紅低烟
烟杯中趣喧喧枕裏迷新年一聲笑四友在潭溪

寄張子平

老矣張平子飄零客此州清樽如有伴白髮不知愁雨
燕稍簾入風花擁檻浮夢中家在否歸興莫悠悠

晚飲

招提聊駐屐却去白雲堆老眼看山倦餘懷向酒開晚
涼微雨送秋意一蟬催醉裏揮犀妙方知有逸才

次韻長汀壁間

竄鼠驚殘夢蕭蕭老屋虛風聲傳遠瀨寒意入秋蔬客
路漂搖入歸身憔悴餘西窓滿殘照髣髴似吾廬

宋詩鈔卷五十三